

處實堂集

處實堂後集卷之二

長洲張鳳翼伯起著

七言律

題文太史倣趙承旨金萱

晴窓綵筆寫叢萱何異鸞書報永年
上有雙松凝紫氣下看三秀茂芝田
忘憂豈必庭前艸養志真成物外天
應是鷗波亭上手後身重作玉堂仙

端陽日爲陸明府生辰

金鄉試宰自翩翩花縣風和艾虎懸
仙吏不同凡吏治素絲剛許絲絲纏
鳧飛雲路還成舄蒲入霞觴不用鞭
此日

琴堂阜民後鳴珂會見聽虞絃

題董大夫光復堂和韻

輪奐重新舊艸堂百年三徑未全荒
遷鶯出谷歸喬木賀燕尋巢識画梁
強項仍須繩祖德下帷勿替引書香
懸知次第恩綸至想見祥雲護粉牆

聞將興大工佐以開鑛作

鼎新宮殿壯皇都柰可司空言有無
陶甓已嚴江左使掄材還入豫章途
羽林先䟽朱提采搜粟難蠲白屋租
聖主憂勤自宵旰不知民力幾時蘇

壽韓存良侍郎

東山雙屐壽而康南極分輝綠野堂
世外獲龍神自王人間山斗道逾光
安車莫訝徵書晚講席須延舊德長
更喜萊公賓魏野不嫌蕭布厠稱觴

邊郡伯考績膺封

臨關永操重吳中出守毘陵宿望同
畿輔兢推今日政循良知有古人風
三年已最明廷試雙闕應褒治郡功
正是熙朝虛九列卽看端笏鳳池東

伍相祠

伍相叢祠晝掩扉盤關懷古一沾衣
郢都再入終酬怨越寇重來已鏡機
龍劒握中惟有恨鴟夷江上竟何歸
英靈

若駕遼城鶴城郭人民是與非

春分蔣都閫邀予兄弟觀梅時其郎君士衡戰藝再
北

百年三徑一追陪客座慚叨二仲來共愛南枝堪寄興豈
惟東閣可啣杯愆期不恨春光半勝賞須憑淑氣催榛莽
謾勞嗟戰藝和羨還屬廣平才

賦得詔菴贈楊分敘

十載雲亭耽艸玄試官吳苑亦青氈不言桃李春風座入
室芝蘭郢雪篇一飽肯教榮二鳥四知行復兆三鱣卽看
栢府勤推轂上賞應須屬薦賢

追往作

何用當尊借虎賁自來名下亦鷄群大兒未必孔文舉後
世元無楊子雲東海比閭閻恩幸婦北山交口迭移文他年
封禪徵遺稿還侈能談七十君

客有戲嘲荅之

浮生躋頓飽風塵一臥滄江白髮新結駟故人多厚祿席
門孺子自長貧膏肓已痼烟霞癖歲月堪留泉石身捧檄
頗能權出處謾言天路有蒲輪

董度支督餉朝鮮

長才自是濟時雄又見乘輅遼海東信有度支能轉餉不

教都護獨臨戎千屯宿飽師貞吉萬里朝鮮帝力通何日
冕旒朝百辟共看千戚舞廷中

聞海上報捷

捷書飛報自遼陽會見朝儀肅建章奏凱幾時歸鴨綠論
功先已辨雌黃青蒲競請修文德白骨誰來吊戰場豈獨
外寧爲可喜閉關只合謝扶桑

恭聞新殿落成

九重金碧麗蓬萊紫殿朱門日月開匠石鼎新閭闔地棟
梁遙採豫章材居當北極雄天府產惜中人小露臺但願
大廷張廣樂虞絃一曲阜民財

送趙撫臺晉擢司空

璠璣聲價重連城坐撫東南政肅清已許百城蒙保障更
看三殿藉裁成出爲開府烽烟息入作司空水土平豈獨
殷宗任先覺千秋還見一阿衡

花下獨坐小酌遣懷

追惟長揖別金臺轉幸明時棄不才鷄肋總輸頭着枕蟹
螯偏稱手持杯雨收西嶺浮雲薄花發東籬野興催世事
驚心宜閉戶柴門敢爲故人開

江令君儀真書至

江干旅況近何如同雁驚傳尺素書祇念畏途多荆棘謾

勞憲府借吹噓關河柳色催春信驛路梅花感歲除計日
仙鳬應向關幾時金馬佩瓊琚

送張明府謫雷陽

官舍班荆得偉人小樓把酒出風塵一行作宰澄清志萬
里投荒慷慨身仙舄乘槎終向關縣花賤淚欲沾巾熙朝
未必恩波隔暫到雷陽且問津

送郭二府公務入京便道歸省

片雲迢遞望長平恰喜賢勞捧檄行郡務馳驅羨子職庭
闈定省借王程須知驛路仙舟發已訂兒童竹馬迎到日
錦堂應介壽吳歛一闌祝長生

朱黃二郡公枉顧小坐時朱公新遷黃公方下車
蓬門竝報高軒過掃徑惟嫌擁篲遲江夏黃香下車日南
陽朱季拜恩時謳歌方起來何暮德澤將貽去後思折節
不辭傾宿釀呼兒急爲摘園葵

騰蛟閣爲泰興陳明府賦

高閣新成不日工朱闌画棟綵雲封江連淮甸開軋道地
卜城隅起巽峰四野桑麻朝賽鼓萬家燈燭夜鳴鍾神君
賸有文翁化會見春雷奮蟄龍

讀漢史有感

漢宮春事在昭陽飛燄應知集未央天憲豈堪含駭馬民

膏安足飽貪狼治河已見無中策折檻空勞請上方蓬戶
只宜養恤緯窮途何必有康莊

送段明府以東鄉君艱歸楚

鳴琴新政出琴川籍甚賢聲段志玄豈意仙鳬驚吊鶴忽
教花縣泣啼鵲四方觀禮天潢重五月居廬巽命傳聞道
群黎營借寇重來應佇代瓜年

聞欲以推轂見擬書懷二首

履畝何勞問石田華門艸徑自年年折腰尚笑陶元亮蹈
海猶嫌魯仲連世上知希方是貴人間名在未稱賢會須
獨放西江棹烟水蘆花一醉眠

已拋棧豆息餘年老驥何堪更着鞭推擇豈云宜傲吏明
揚安敢望時賢冠當皓首惟應挂車到窮途亦可懸況是
漉巾蓬累者肯荒松菊艸堂前

題天池毛公阡

中丞不惜買山錢奕世恩波一壑偏總是枕中傳度難肯
容石上學逃禪雲歸馬鬣封黃土雨過天池洗碧蓮只合
滕公居此室佳城鬱鬱自千年

贈彭文學次嘉因懷厥考穉修邑諭

名流標格自翩翩放舸遊吳逸興偏衛玠座中辭樂廣馬
融門下別彭宣交知憶昔憐傾蓋風調于今喜象賢漫許

臨邛留重客上林奏賦是何年

賦得老將投贈

回首黃沙百戰場玉關人老髮毛蒼
驥當遲暮猶難伏鷹到秋風尚欲揚
殺氣未消金鎖鎧血痕常染綠沉鎗
渭川不遇君王獵正好垂綸烟水鄉

寄唐戶部

顧盼叨承酒德清于公數石益精明
陸沉尚未登三事吏隱惟應賦二京
任轉成均身是教曹分邦計地爲名驕
驪自是唐侯駕會見朱輪入帝城

余山入來吳致魏甫佳甫以昭齊昉嘉祥衡之諸宗

侯書問贈此併荅

豐城劒氣武昌魚共說朱門好曳裾游子已成司馬倦王
孫猶寄豫章書歌殘短布空憂杞才比長庚尚隱廬自昔
維城藉宗國不知何以衛王居

哭徐光祿子本

孟嘗客散一潸然轉眼豪華四十年明月任低歌舞袖綵
雲常貯綺羅筵忘疲無俟陳遵轄載酒渾疑范蠡舡此日
人民異城郭頻知滄海亦桑田

顧居士夢得一印文曰滄洲漁隱屬予賦之

鏡機早已寤卽卿天許分封烟水灘信是黃金懸肘後豈

如白髮老江干無心熊卜何須獵不着羊裘亦禦寒世事
大都俱大夢總輸風月一輪竿

奉贈監司徐公

仁聲憶昔滿三吳挺節重臨兆庶蘇碑載去思仍在口歌
成來暮豈無孺豸冠持憲清霜肅駘馬行春甘雨俱信是
南州華胄遠臺端還見鳳凰雛

倩蔣公鼎顧叔起儲米

知君棲畝有餘糧請爲東方貯一囊不遣腐儒供苜蓿且
令貧士乞橫擲折腰懶性逃官守餬口迂謀累紀綱但願
老懷寬足食含哺追逐少年場

送毛肇明署教青浦迎養

釋褐依然戲綵身
廣文薄祿未全貧
處囊應許錐先見
捧檄直看喜爲親
索米不須如曼倩
扶輿何必美安仁
鱸堂新息扶搖翮
計日天門雨露新

送張中秘孟奇歸省五羊兼懷元輔趙公

然藜簪筆重鸞臺
暫許寧親獻壽杯
來日已同江上雁
到時應及嶺頭梅
星窺牛斗乘槎便
路入鱸鄉歸興催
賢相正開東閣待
東山雙屐莫徘徊

陳清卿廣野遊吳贈此

省垣秉筆擅封章
素範尤推漢太常
忽漫畏途成豹隱
亦

知仕路有羊腸北山猿鶴邀雙屐東壁圖書寄一航計日
帝城應再入子公猶未借陳康

感本寧康憲書問至

悟言一別忽三秋佇望雙旌數倚樓關令未能占紫氣仙
輅先已過青牛民歌來暮迎康范書報危明感鄴侯古調
自應傳憲府幾時傾耳聽高流

郡理朱侯見過潏酌馮汝金及予伯仲俱大醉而侯
獨醒然而別爲賦二首

高軒忽枉慰逢迎手摘園蔬宿釀傾腐脇自慚非酒對忘
形元不厭狂生止談風月惟今夕暫憩烟霞續舊盟信是

清朝于晏倩須知數石益精明

春光開歲上新符擁篲叨迎子大夫幸見獨醒如正則敢
辭法酒醉淳于五年報政雲霄近三尺平反雨露俱不倒
玉山翻勸主肯嫌顏放藉人扶

壽葉諫議處元

熙朝碩望重名賢抗疏歸來歷歲年已見丹心常捧日須
知白簡合朝天金庭寄賞疑雲外玉樹相輝繞膝前虛左
瑣闥應有待澄清早着祖生鞭

臥病感懷

淡旬伏枕鮮招尋回首浮雲感慨深桎梏已應辭物累枯

樺猶未息機心當年足別荆山玉晚暮囊空季子金莫恨
抱琴成獨坐高流自昔少知音

懷劉伯健

秣陵天際渺寒蘆潮落空江雁影孤聞道相如完趙璧且
令合浦返遺珠人情此日堪投杼客路何年復棄繻離落
未荒秋未老只應醇酒醉醺醺

述懷

小齋調息絕囂塵几茶槍自主賓老去春情應按劍年
來秋賞已埋輪須知周道還如砥何必秦源復問津莫笑
臣門舊如市臣心如水白頭新

荅陳季襄次來韻

公車待詔氣凌雲良寶終知合獻君才在自能開豹霧賦
成客有薦雄文一詩惠我追風雅三復令人廣見聞簪筆
愧難酬妙唱和鳴還俟鳳凰群

正歌館

斐几蒲團殊有情竹爐瓦鼎午烟清短牆不隔長林色靜
院時傳啼鳥聲留客莫嫌無特設忘形自可說生平歡然
鼓缶陶然醉一枕邯鄲夢已成

正歌館成仲弟携尊落之星宿二兒暨諸孫咸集作
隔水茆齋喜落成敢期高駕慰逢迎勸酬兄弟黃鸝薦歡

笑兒孫紫蟹烹好身林端呼舊主斜陽窗外報新晴人間
自有蓬壺樂何必尋真海上行

初宿生歌館

短垣蓬戶喜新成艸榻高眠夢亦清殘夜月來連曙色叢
林風入作秋聲黃金顏面籬邊菊白首勲名水上萍樂志
不須尋仲論吾廬已足適吾情

送江大理詳刑滇南

彌年報政起雙鳬宦拙于今尚畏途官轡一階廷尉正詩
成千首步兵厨天開參井文星入澤布陽春涸轍蘇金馬
碧鷄何用訪點蒼山色自應圖

子夜冠至作詩謝之

荒齋卑外媿綢繆鑿壁穿墉何所求除却青毡無長物豈
同狐白有重裘館人業屨憑誰得楚客亡弓任爾收其柰
臣門竟如水夜寒空自下魚鈎

吳體中臧方見過贈之兼懷趙玄承

縉雲仙吏晉熙豪簡命衡文拔俊髦駐節尚能尋隱逸長
齋似欲報劬勞八閩驥足千金價萬里鷹揚一羽毛相對
憂時敢捫虱班荆祇可問同袍

虎山橋看月施叔覲携具

萬壑逶迤跨石梁半輪烟月印寒塘龜山似吐長生氣雁

塔疑流舍利光
途酒不辭重蕩漿
班荆肯惜更傳觴
宵分露冷扶殘醉
身世渾成何有鄉

庚子除夕

蹉跎節序律將回
荏苒流光物候催
不盡寒威消爆竹
漸來春信報江梅
壚頭祀竈黃羊薦
膝下稱觴綠蟻開
消受亦知天錫福
敢云蓬藿有蓬萊

潢水澄清爲段微之明府賦

桐汭分符報政成
地靈早已效河清
亦知潢潦難爲鑒
忽似滄浪可濯纓
鼓舞千門沾德澤
謳歌萬口溢仁聲
陟明自合先三輔
定見綸音出五城

送江令君晉擢考功

六年勤政報澄清一夕除書下玉京應是縣花曾夢筆須
知銓筦合持衡雲開泰道千門闢風送仙舟五兩輕自信
彈冠非我事感知惜別獨含情

朱郡理考績

清朝釋褐佐龔黃執法星懸牛女傍四野謳歌騰北闕一
時聲價重南陽銓曹報政先明試憲府推賢首薦章當宁
飛鳴應不遠佇看臺省借輝光

邵節推考績

茂齡射策入明光試理毘陵政績揚三尺王章持苦節千

秋祖烈紹甘棠得情自信兼雷電以恕無妨凜雪霜豈獨
恩輝申巽命方懸清要待循良

元旦大風

元辰物色自年年信宿還風豈偶然盛怒應乘土囊口爰
居疑止國門前偃禾詎有金滕在退鵬空嗟巽命傳欲守
四方須猛士杞人無事獨憂天

贈荅李都督

金臺推轂重元戎銅柱先標第一功才氣應歸漢飛將捷
書已入未央宮崔嵬京觀鯨鯢盡恢拓輿圖郡縣同寄語
黎平蚤輸款莫教後至作防風

禹谷爲王邑博道錫賦

佳城鬱鬱足風烟別構菟裘得地偏一脉靈源通禹穴百
年風樹近原阡傳經價比龍門重依隱聲同土窟傳長戟
可容前路廣已占閶闔在樓舡

春日漫興

二月韶華次第催梅花零落杏花開眼前物色從吾好門
外軒車任爾回破榻殘編供午夢香爐餘火煖新醅不知
潘岳閒居賦何似淵明歸去來

過陳游擊故居

當年歌舞自繽紛此日空堂宿東雲無復小山招隱士獨

留大樹說將軍烹羔莫罄尊中酒相馬誰扳冀北群白首
重過感疇昔枝頭黃鳥不堪聞

春日漫興懷諸丈公車

短牆春色過東隣滿眼芳菲花柳新柳學修眉無待画花
疑嬌女欲窺臣力能乘興渾忘載酒足供賓不厭貧計日
金門應策士對揚休命是何人

清明日期陸別駕重周過其長公學憲羽行後園看
花不浹旬而風雨大至獨坐有感因懷諸同袍公

車報罷

清明載酒酹花神喜得機雲作主人席地幕天能幾日櫛

風沐雨又經旬狐疑安石登山屐狼籍林宗折角巾遙憶
同袍裘欲敝長河初洗洛京塵

聞李廉憲本寧左轉書懷

竭來尹喜侯關門祇自逍遙類漆園作賦扶搖九萬里著
書道德五千言畏途險阻何嫌拙戀闕迢迢欲報恩共說
殷宗應夢弼幾時誼主更臨軒

久雨獨坐書懷

柴門積雨杜招尋空谷何須喜足音梁燕飛飛營舊壘海
鷗泛泛息機心簷前垂柳烟光濕屋外懸蘿水氣侵世態
自來翻覆手豫章書札任浮沉

積雨懷張幼聞

幾時尺璧返松楸何日乘槎入斗牛
眉嫵漫跨京兆尹蒼筤誰說富平侯
綺筵詞出凌三影綵筆詩成祖四愁
一自屋梁明月落年年燕子掠空樓

雨中書懷

問予何事晏松蘿顏放惟應鼓缶歌
倒屣不諳迎結駟褰裳那可就餘波
雨中樹色分濃淡夢裡棋聲爛斧柯
何日西山開爽氣夕陽取酒一揮戈

病齒獨坐有懷

問我何爲太瘦生輔車交惡獨關情
壚頭藉爾分饘粥松

下憑誰采茯苓巢燕繞梁尋舊壘遷鶯出谷試新聲懸知
掃徑逢迎處一曲清謳十五城

送曹別駕督運北上

平陽門闕自賢豪任郡吏吳一鳳毛喜見書傳烽火息肯
辭國計轉輸勞連城聲價蜚天漢三峽鄉心夢雪濤熙世
考成應綜核題屏元不藉名高

送朱郡理晉擢天部

楚材釋褐理吳城簡要清通久著聲方喜庶民借威惠忽
傳除目晉銓衡雲開帝座金門闢風送仙舟錦席輕快觀
進賢蒙上賞須知大鳥欲飛鳴

朱太府擢蜀憲旋移嶺南督學

帝簡龔黃出玉京五年政績重題屏
攀轅欲借南陽季叱馭將爲西蜀行
鳳闕右文申異命羊城移憲待持衡
恩叨國士慚無報愁聽驪歌第一聲

獨坐有感

獨坐南窓景物幽晚雲催雨報新秋
自來自去驚梁燕機事機心息海鷗
習氣未能除白眼達生何必志丹丘
一編別有陶情處不羨金陵數莫愁

范居士君和見過予病暑辭客賦謝

科頭赤脚晏泥塗門外從知襜襖無
誰謂蓬蒿張仲蔚能

延魚釜范菜蕪空林自合逢僧話河朔何勞逐酒徒興盡
不須營見戴乘舟知欲返精廬

肇明臥病青浦官舍叅候

憐君伏枕忽踰旬一水空勞問訊頻勿藥喜承慈母色傳
經強起課兒身床頭不厭青氍舊鏡裏還疑白髮新老我
未能成訪戴九峯南望獨馳神

九月八日風雨獨酌

菟裘晚卜似空村三徑蕭森秋興存遍插茱萸近重九滿
城風雨自黃昏雖無負郭田餬口幸免催租吏打門欲飲
不煩人送酒林頭宿釀尚盈樽

賦得木庵贈金上醫

獨憐仙侶似劉商服水焚香禮藥王
豈必廬山多種杏亦知客舍遇長桑
春生九轉壺中秘功滿千金肘後方
聞道彤廷方授印會看保御奏無疆

題梨花画幀

漠漠香雲鎖薛門嚶嚶嬌易度
前村遠山對鏡羞眉嫵細雨
窺簾墮粉痕恨不折來遺素女
若爲飛去喚王孫枝頭別有啼
春處似爲洗粧傾綠尊

孤山

武林孤山元不孤千秋爲伴
有林逋陰崖作潤蘿經雨絕

壁含風虎負嵎雲外踈鍾傳北刹臺前幽徑入西湖斷橋
豐草藂祠在爲問梅花今有無

月巖

湖上群峯暝色催月巖邀月月徘徊試看石鏡空中白知
是水輪海上來兎鬼遙將廣寒影桂藂近借小山開那能
重卜中秋夜爲證光明酒一杯

烟霞洞

寺裏雲霞洞口烟個中色相自泠然雖知羅漢無名欲亦
藉錢王永歲年定霸勲庸元夢境表忠祠觀作桑田清虛
總入逃禪地不辨青蓮與白蓮

游支硎寺

琳宮佛臘近清明
躡屩追攀覽勝行
紅紫繞林花作市
杯盤遍地客傾城
流泉噴雪千巖淨
曇樹含雲四照榮
歸路不煩支遁馬
乘風自喜一帆輕

天平

天平傑出俯羣峰
屏障西南紫氣重
突兀書空疑卓筆
崢嶸簪笏共朝宗
蘇公題處崖端石
范相祠前戶外松
不是舉頭紅日近
翠微安得白雲封

靈巖懷古

當時越女侍吳王
洞口桃花遜艷陽
一自五湖舟載去
幾

番三徑采餘香空門僧汲牽絲井繡壁人樵響
廊日暮携筇聽鳴咽依然流水出宮墻

次韻答李大將軍秉和二首

元戎遠興締清緣幕府詩成五色烟豈意樗材當匠顧誤
言草聖屬張顛千秋夢卜丹青並萬里神交尺素傳不負
熙朝推轂重須知偉績自無前

飲至逢傳奏大章君王喜色動披香當年漫數平淮蔡此
日真看下定襄千里羊腸清跋扈一方黔首願徜徉由來
武備兼文事應有新詩寄草堂

劉宋卿自楚歸見過劇談時事有感

故人契濶意何如返棹三江訪敝廬
方我循墻吳苑鹿正君借筇武昌魚
相聞巢燕千家幕不得驚鴻一紙書
此日班荆話曠昔臨風把酒各躊躇

遙贈袁憲副兄子原正授簡

奮岳靈秀自逶迤應有袁昂千里姿
柱後一聞推薦史臺端重見借台司
天開參井周分野地盡西南漢屬夷
不是阮咸來向說勤宣安得野人知

贈楊掌教

西蜀名儒上國賓宣城教出風塵萬
言誦習三冬足六月扶搖一息身作
賦窓中敬亭月橫經座上錦江春群
公

共有推賢意計日鳴珂入紫宸

頒赦懷張疑益明府

秋風天外憶鱸魚千里雷陽歎謫居盡職祇應官下外餘
生猶藉獄中書壯心未老悲彈鋏直道難回誓掃除此日
金鷄弘赦宥遄歸好慰倚門閭

于璽卿文若枉過奉贈

揚帆計日向留京尚璽名高漢九卿微服無妨紆客路幽
尋猶可借王程懸河雄論經綸略擲地新詩金石聲青眼
自宜人外適不分蘿薜與簪纓

送周明府起白赴任宜春

春日揚帆物候新須知花縣正宜春渡江柳色如迎客夾
岸桃花好問津振鷺亭前飛皂蓋蟠龍山下擁朱輪相暨
一水遙憐別惆悵東風自飲醇

懷石湖州堂

憶昔放舟追賞音石湖東畔艸堂深群峰過雨連天碧五
柳含烟接地陰旨酒盈尊傾北海美人一笑擲南金祇今
回首卽卽夢斷岸荒臺何處尋

上元前雪月感舊效長慶體

憶昔上元欣賞處華燈雪月照門屏今夜重逢昔年夜可
憐雪月自澄清人間那得長春苑天上元無不夜城漫寫

金經資冥福末由石上證三生

贈于長君爾覺

信是高門子丈夫掌中明月出驪珠白睂重見麟之趾丹
穴須知鳳有雛一息扶搖將萬里千秋詞賦逼三都試看
座上昂霄氣不獨終軍可棄繻

兄子原正屬予書扇寄陳少司馬因奉贈

一別雙鳬三十年去思猶在口碑傳勛高台鼎登三事仁
覆西南撫半天夜月運籌黃石略春風開府碧鷄仙感知
自由泥塗尾不爲前鋒舉謝玄

松陵劉明府枉過賦謝

夢府嵯峨玉壘平
渝州秀發錦江清
明時對策通仙籍
劇邑分符起政聲
氣吐垂虹成保障
禮鉗驂馬制橫行
公餘飛蓋勞相顧
肯靳柴門倒屣迎

壽孫儀屋孝廉

孝廉聲價重璠璣
八斗才華萬卷餘
羅附幸叨三黨誼
神交未達八行書
追惟昔奉尚書履
却憶曾攀刺史車
此日稱觴及佳節
愧微一葉曳長裾

有感

欲鼓朱絃杳聽聞
由來黃絹亦徒勤
雄飛已倦圖南翮
疾足難空冀北羣
命中自知非爾力
賞音誰與定吾文
覆瓿

本是玄經事何必桓譚識子雲

送李化始充貢入京

聲華自昔重賢宮賓貢應推竹箭同千里竟酬嘶歷志一鞭行表識途功到門定有人投轄奏賦寧無客薦雄想得錦囊收麗句不嫌渭水起秋風

送金諫議秉中赴任留都

永豐憶昔試分符籍甚聲華遍兩都五位三年鳴大鳥一朝雙闕起仙鳬白門價重連城璧青瑣光生照乘珠老我通家頻拭目佇看焚草贊黃虞

贈王兵憲

清源人傑入通津試宰仙都早出塵再命已成驄馬使一
麾還訪碧鷄神臺端攬轡澄清志江上觀濤砥柱身聞道
九重方側席持衡計日作虞賓

贈楊兵憲

扶風岳牧冠台司奕葉聲華重四知此日登臺身作柱昔
年典郡口成碑雲龍天上趨朝近保障江干臥治宜聞道
黃扉虛九列承恩早晚入彤墀

挽徐侍郎公堅

公車昔逐鳳凰群挈榼論文每荷君傾蓋一時移白首泥
塗數載隔青雲已知伯道虛熊卜誰爲中郎借虎賁一水

荆溪空帳壁不禁清淚灑斜曛

題大樹圖爲薛虞卿賦

衡堂卜築面欣欣信是河東綵鳳羣
城市喜看存大樹詞塲亦自有將軍
雲開日午清陰合雨過風生古幹分
此日披圖想幽勝何當携酒一論文

旣買蟹復烹鷄方自嫌侈星兒又進燒鴨戲作

多少飢人泣道傍似緣租稅不緣荒
已叨白粲三餐足只合黃虀一甕嘗
持蟹旣能供茂世烹鷄何必進賓王
老饕誤爲痴兒擬更獻燒鳧佐舉觴

秋夜足冷不寐作

衰病經秋已畏寒
宵分僵臥似袁安
履霜忽訝藏冰早
踏雪方疑挾纈難
自媿腐儒牽布被
却輸老衲擁蒲團
亦知生處堪爲樂
不道床頭有紇干

題夢胥圖贈劉明府

百里分符及妙年
一時民社屬蒲鞭
垂虹雨露華胥國
震澤烟波玉柱天
花縣仁風披綠野
琴堂古調出朱絃
祇愁丹闕飛鸞舄
父老無由致一錢

始春閑顧道行詩志感

偶讀新詩憶故人
新詩已故歲華新
歌殘子夜空回首
和寡陽春獨愴神
綠水自縈龍臥地
彩毫難起虎頭身
知音

漸覺于今少一任牙絃生網塵

荅王百穀未寓解嘲之意

久耽空谷學愚公何意聲華月旦同老驥自應淹冀北冥
鴻元不媿墻東贈言直作陽春雪倚和真慚牛馬風君旣
忘機臣好道任教飛燕在宮中

土少司馬自川湖書問至賦報

漢家都護一臨邊底定西南撫半天汶嶺烟消開幕府川
江雲暖御樓舡遙憐記室絨書日想見轅門綏帶年延攬
豈無班孟輩爲銘勲烈勒燕然

壽仲氏二首

春入吳天麗少微遙連南極耀春輝憐伊狂態于今少不
獨年華號古稀北海嘉賓時滿座東山歌妓不言歸上元
漫侈夫人謨未許兒孫舞綵衣

辱吾七歲長乎爾知爾百年當勝吾有興張燈隨喚妓無
錢貰酒亦呼盧題門不顧時人誚罵座寧容禮法拘自是
襟期傾海內掩關未必著潛夫

蕉園玉蘭盛開座上口占贈伯健

春色中分夢鹿堂雙開玉樹報年芳小山漫侈黃金粟大
谷虛傳白雪香珠薤忽疑還合浦璫花似不在維揚知君
已擅江淹筆應有瑤華發夜光

文起昆李見過失迂次日文起有作如韻奉復二首
翩翩連袂訪衡堂蕪穢何緣得衆芳其奈片時題字去獨
令三日坐猶香重懸木榻空懷孺漫憶玄談却媿揚賴有
瑤華慰惆悵頓教幽谷發潛光

清年讀禮息芸堂萬卷三冬足潤芳金馬自應登侍從玉
階猶未試含香時多絳灌難爲賈文似相如孰薦揚才在
不須嗟寡和賦成終得獻明光

嘉定韓明府考績

馮翊神君有一韓練川政績報長安恩融照日三冬煖紀
肅清霜六月寒地書青龍濡德澤江連白鶴息狂瀾久虛

清要須強幹計日仙臯奮羽翰

有感

鷦鷯只合晏蒿蓬敢逐鷹鵬趁遠風漫說衣冠矜節下肯
邀車騎過屠中清泉白石令人貴豐艸長林豈道窮大笑
出門若笑訝年來青眼已觀空

十七日喜雨

片雲拖墨覆頽垣倏忽甘霖遍薜園直瀉金人承露掌平
傾玉女洗頭盆一時暑氣千門盡四野歡聲萬竇存不獨
桑林勤禱祀獨憐民瘼賴乾坤

七月四日送客之留都售酒時立秋已三日矣

西風祖席聽驪駒江畔揚帆指帝都天際雙星陪後乘林
間一葉作先駟舟橫古渡佳人問酒載新豐上客沾回首
故園知不遠長洲烟月照人孤

黃河

司空自合檢河渠中使猶尋食貨書濤湧桑乾方下壁塵
生瓠子復行車濁流田海胡爲爾潯水懷襄蓋徹予只合
杞人憂社稷夾排何事渙王居

新秋獨坐

林端風色作新秋晝掩荆扉事事幽千乳結成桐淚盡一
棋開處茗香浮來鴻去燕寧論主喚雨呼晴總任鳩陸海

大都多苦海滄洲知卽是瀛洲

憂旱

晨昏香火禱桑林信宿驕陽轉鑠金雲散西山龍母廟月
敲南國女郎砧砧疑水氣能干土安得江都爲縱陰天意
似冤東海婦人心空自望商霖

適有歲時事
故未及之

次韻荅趙仁甫見懷

執苑聲華敢並駢自來司馬號開都卞和有壁還歸趙梅
福無官只隱吳千里相望雙眼盡八行曾到一緘無仙舟
忽過攀難及惆悵新詩與夢俱

客戲唁予貧病荅之

滿前秋色屬吾廬
滿眼浮雲任卷舒
何必皂囊留長物
不須鼠壤有餘蔬
夢酣艸樹身疑蝶
家近江湖樂是魚
須信臣心已如水
肯容消渴到相如

秋夜苦蚊

夜長應屬冬之夜
秋夜偏長異所云
孤枕傍徨艱夢蝶
五更磨障苦多蚊
敝幃殘月頻疑曙
遠寺疎鐘那得聞
何日清霜駢酷吏
一尊菊徑醉斜醺

夢幼聞

恍惚重回擲果車
屋梁月落夢來初
青年無分登金馬
黃土何時堊玉魚
三載幽明隔人世
一屢冥漠寄僧廬
故人

不盡西州淚安得松門宿草餘

送洪掌教會試

待制雲仍歎浦奇早通桂籍擅高枝偶緣銓筭推都授却
爲兒曹喜得師一息待年經六月三鱣入座報昌期龍光
射斗金門曉知是天人獨對時

金黃門寄示賢書報此

秣陵西墜路漫漫寄到賢書秉燭看誰謂白門成吏隱須
知青瑣是仙官天街香散分瞻宿淮水波搖動廣寒共說
熙朝無闕政不煩章奏上長安

送許鎮江入覲

彤墀佳氣布璇空紫禁春生雨露通天列星辰齊拱北地
分江漢盡朝東四方一統車書會八百諸侯玉帛同聞道
虞廷將考績陟明只合首扶風

賀張文學遷居

喬木從知有舊廬浣花欣見卜新居試看燕雀仍堂構應
信蓬蒿任掃除仁里不須嫌近市德門自可俟高車由來
列戟君家事計日泥金慰倚閭

遣興

菲齋寂歷不言孤自有茶槍與唾壺閉戶無妨人剥啄固
窮何必鬼揶揄朝披一卷醒殘夢夕喚羣孫學計雛身世

久拚同伴御寧知吾道有隆污

送曾令君入覲

下車聲價重江東
暮月鳴琴政教通
花縣甫沾靈應澤
布帆先掛舞雩風
九重宮殿朝元近
萬國衣冠述職同
只恐仙鳬留魏闕
謾勞竹馬候兒童

缶歌館獨坐

鷓鴣別有一枝棲
啄月餐雲興不迷
歲晚松存彭澤徑
春來花作武陵溪
靜中調息人難老
象外觀空物可齊
近市未妨心獨遠
何須躡屣入丹梯

贈道養朱道人

春風到處趙升桃何俟瀛洲餌玉膏
福地神遊竊海藏釣天夢入聽雲璈
五禽戲就黃梁熟九轉丹成紫氣高
通籍不須勾漏令嘉名知己掛仙曹

春日感懷

三十年来兩鬢霜自矜早已識行藏
筆畊亦可爲長策花事何嫌隔短墻
敢謂鵝群堪勒石不須鷄舌學含香
春風未報同袍信多少螭頭列雁行

清明後一日驟熱明日忽作寒紀此

昨朝蒸熱岼綸巾里巷兒童半裸身
一夕風生寒起粟片時開篋檢懸鵝
隨心厚薄移單袷轉眼炎涼感屈伸
天意

人情總難必敢將調燮問天民

贈蕭征西季馨

麒麟高閣俯神州又見元勳有鄧侯名重無雙推國士威
宣統萬落旄頭龍沙牧馬朝駘陣帟帳談兵夜運籌報道
天驕今款塞邊關直欲罷防秋

贈范餘季塾師

忠貞世望重賢門祐啟應知屬耳孫瓜_瓜百年綿義澤
編三絕賁丘園江流繞宅魚龍化城樹當堦桃李蕃天意
不教寒范叔方來朱紱待臨軒

送王邑博陞任馬平

都授中吳久著聲鼎新宮闕煥吳城橫經甫徹臯比座剖
竹將爲象郡行門下青衿攀後乘嶺南黎首望前旌鳴琴
只待瓜期及定見仙鳧上玉京

客有携豚肩大桃之具過飲漫成

追懽宜不厭蓬蒿荒館壺觴興亦豪向我忘形豈生客慰
人契濶是醇醪肉均似出陳平宰果熟疑分舅倩桃共惜
餘春莫辭醉南牆穠綠滿林臯

漫興

早年書劍慕登壇垂老方知行路難敢望右軍客入室寧
祈左氏列衙官文章聲價隨人減筆研精良強自寬寄興

一時聊復爾步趨安得學邯鄲

題竹林七賢圖

獨憐江左擅風流七子追隨看竹遊
三徑清芬占鳳德一林直節作夷裘
聲希嶰谷人間世雲冷簣簞物外求
風景不殊終日醉陸沉誰復嘆神州

贈謝玄瑞文學

黔中玉樹出藍田負笈擔簦路八千
季札遨遊觀禮樂子長詞賦藉山川
池塘鄉夢空餘草淝水家聲好着鞭
異日石渠登俊乂乘軺應憶棄繻年

送蔣成甫赴任成均

辟雍崇教報掄材欣見除書 帝所來二仲遙憐三徑隔
諸生競謁四門開金臺燕喜春風轉震澤龍吟化雨催倚
杖津亭瞻北極翺翔知爾入蓬萊

分得泉庵壽于大宗伯

觀泉不獨有莊生避世伊周無世情海上一籌添歲月人
間雙屐踐遙瀛碧山難老山中興黃石空寒石上盟北墜
三台親帝座莫辭早晚入承明

王百穀誕辰馬姬命禱孺侶遠來稱觴吳中使爲勝
事賦此

青蛾絳節擁樓船千里稱觴勝事偏欲証三千花結子先

看七十老而傳名高冀北心猶壯跡寄牆東隱自堅計日
延英須召對會逢玉局賜金蓮

挽胡孟弼秋官

一時聲價重成均兩疏簪邊總報聞祇謂幕中應借箸寧
知天上待修文星歸東壁迷青眼月落西曹冷白雲三十
年來成契濶可能江浦醉夫君

栩栩園爲尹大中丞賦

園在承天府

數椽川上狎樵漁三徑蓬蒿試掃除不獨漆園宜夢蝶亦
知鄴架可藏書蕭蕭竹樹丹丘近歷歷池臺紫氣餘漫使
帝鄉多勝事清朝未許賦閒居

原缺

除夕聞馮大叅道憲府推轂之意

不須末路始停驂已向窮途得指南膝下諸孫譁乞果目
前一味慰分甘燈花報喜占餘慶爆竹催春助半酣寄語
明堂賢匠石莫將樗朽作榱桷

覽稗史

江左春回燕壘新天南自穩蟄龍身倉琅夜鎖長門恨羅
結香殘輦路塵鍾鼎一時移舊觀江湖幾處泣逋臣稗家
替筆寧無意閒覽遺編獨愴神

二月朔大雪念星兒客留都

遙憐春雪石城隈浙瀝寒窓短夢催雙闕雲迷鳩鵲觀千

林東合鳳皇臺懸知客路鶉衣薄但願皇州淑氣回惆悵
擁衾成獨坐幾時音信報江梅

壽陳龍潭一百一歲

問年知爾百餘春閱歷須知過古人四百四十五甲子二
萬二千六百旬元爽定容恭後乘張蒼亦可作前身五龍
睡法應相授不獨希夷解出塵

荅周屯通書問二首

羈旅遙憐薊北天漫勞雙鯉素書傳雲迷合浦投珠日人
老荆山泣玉年代舍未遷彈鋏客鞵囊那得買山錢故園
三徑依然在莫負長林未了緣

歸心不及大刀頭，彈鋏惟應斷蒯緱。
欲待河清歲云暮，未逢得意鬢先秋。
無媒孤客空懷刺，多病羈人尚倦游。
聞道紇千能凍雀，可堪重敝黑貂裘。

贈張彥升時在蕭大將軍幕下

風塵快覩駕長車，紫塞黃沙借箸初。
漠北自應知水草，河東何必具亡書。
字追定遠將投筆，名托鄴侯堪曳裾。
談笑幕中垂竹帛，毋論蓴菜與鱸魚。

贈蔣明府明琅

遙憐快吏試分符，賦就歸來一棹孤。
誰謂君才非百里，不教仙舄化雙鳬。
折腰升斗誠難事，滿目風波總畏途。
此日

柴門延二仲喜看三徑未荒無

病後大雪

嘉平月朔朔風斜信徧中庭
颭六花夜與虛窓催曙色朝
看叢薄翳瑤華橋邊覓句神
應王湖上尋梅興亦賒不似
小樓屏病起竹爐吹火自煎茶

題老子像

兩間秘籙發真源
鑰初開衆妙門
谷口青牛方稅駕
車前紫氣已臨軒
乾坤不老身常在
天地皆歸道自尊
何必扶搖九萬里
但看道德五千言

送毛公輿擢任春官

理劇賢勞歷五霜法星今始應文昌清華脫穎官非拙瑞
錦榮親日正長秋水江干開祖席春卿署裡佇仙郎欲知
故舊相望意繩武須教奕葉光

喜雨

中丞徒步禱桑林赤日寧辭可鑠金上相登壇紆劍履群
公列拜俯冠簪民情方切來蘇望天聽能無藺在心應使
諸陽閉西嶺行雲拖墨布商霖

遲毛筆明

鄉書何日到羅浮歸棹多應及暮秋朱槿江頭疑客淚丹
楓嶺表助羈愁長途無計催征旆薄祿還須典敝裘一日

莫憊妨五斗致身元不爲身謀

卽事

一鞭回首玉京塵三十年来物外身敢望晏嬰知越石肯
同轅固薄平津不能釋褐甘衣褐未下蒲輪已曳輪野性
自應安布素懸鶉適體亦垂紳

志感

卜築蕭齋一徑斜南牆綠蔭借隣家消磨壯志沾泥絮安
頓浮生落溷花每映青山延返照應陪白髮老年華誰令
剪伐婆娑盡無復藂林噪晚鴉

懷屯通久客都下

幽藪逃名久繫瓢書來爲解故人嘲共言隱士疑隨駕不
作山人早構巢燕市放歌裘欲敝齊門鼓瑟柱應膠風塵
倒屣知誰是只合撻觚廣絕交

欲購人參力不能得自慰

價懸不二自韓康漫檢千金肘後方多病能無須藥裹食
貧其奈澁空囊經時肺氣同消渴垂老心旌似醒狂一榻
清風破孤悶夕陽支枕亦羲皇

老去

老去臨秋靜掩關臥遊偏喜望中山一官未試宦先拙三
徑不營心自閒顧曲無能追往昔扶筇那得逐躋攀空庭

誰謂長岑寂亦有浮雲時往還

贈張金粟言若伯仲

喜看昭代有文成祖述應標繩武名定許青錢推學士豈
惟史遜屬先生瞻枝八月空仙窟雁序連雲指帝城故
老相望元不淺不知何以佐承明

八月十二日過劉伯健山庄夜歸作

東南賓主自應劉別業新成面虎丘委徑不須金作谷曲
池堪與鷺爲洲傾尊欲醉忘歸客返棹多逢卜夜舟不是
中流蕭鼓沸安知佳節近中秋

感事自述二首

原缺

歲何須驗杖朝塵世榮枯俱泡影達觀鵬鷃總扶搖莫嫌
皓首成堅瓠猶侘風前早棄瓢

項郡博以子考應封

八閩敷教道方傳三輔分符報政年桃李從風沾化雨絲
綸計日錫堯天過庭詩禮雛成鳳濟美簪纓兆是鱣開說
辟雍崇講席五更三老竟誰先

周以寧新居招飲

清門賀燕正乘春良日嘉招快飲醇湫隘久慚仁作里高
明初許德爲隣禮隆虛左叨衰載誼薦忘年愧主賓相對
知君雄宅相佇看六翮出風塵

出塞曲爲杜將軍日章賦

高牙大纛擁貔貅白草黃沙紫塞秋
映月纔聞吹画角占星已見落旄頭
誰云禦虜無奇策試看元戎有壯猷
正是拊髀思頗牧莫愁飛將不封侯

送戚山人之內黃

青春負笈向陽平白社爭題折柳情
驛路風花隨馬去長河烟水趁潮生
游揚亦俟曹丘力盤礴應高令客名第
取錦囊多得句莫因投轄滯蹄程

上周撫臺四首

中丞撫字獨心勞憲府聲華泰岳高
折節致恭勤士禮約

躬從儉惜民膏鳳輝豈必翔千仞鶴和還應及九臯信是
飲醇容易醉下方先已沐薰陶

一時民瘼切三吳四野雲霓望有無獨爲蒼生虔禱祀不
辭赤日舍車徒爲霖喜見回天力沛澤應教遍地蘇萬寶
告成非偶爾頌聲早晚達皇都

栢府崔嵬獨坐尊大夫秉鉞亦春溫剪除荆棘栽培力掃
蕩萑苻衽席恩仁覆百城膏澤遍法清三尺雪霜存周侯
傾曲遺風在試聽吳歆頌不冤

晨開栢府辛登龍瞻對尊光謁德容須信義高應得士獨
慚臣老不能從謀猷已見清江藻勳烈還期勒鼎鍾非是

鯨波徵海晏細泥何以慰朝宗

卽事示韓甥

輪竿久已晏江潭羔雁何緣到小庵
漫許逸群超冀北豈容捷徑借終南
持螯畢卓一生足採藥稽康七不堪
况是踈慵謝棋局元無別墅乞羊曇

送錢郎中出守廣西

公子王孫一鳳毛封胡羯末未稱豪
分曹不厭爲郎久柔遠寧辭出守勞
命寄專城天萬里夢占五馬益三刀
懸知坐鎮蠻烟息計日承恩謁赭袍

宵征感夢

斷烟荒草濁河流策蹇衝風生客愁殘月一痕鷄報曉疎
星數點雁橫秋麗眉易老人間尉猿臂難封塞上侯往事
不堪成夢境兩行清淚濕貂裘

自壽

由來蒲柳易凋零何意松根有茯苓里巷長年堪屈指間
閭稚子半忘形窓前攬鏡頭應白夢裡觀場眼尚青咄咄
書空無一事閒瞻南極老人星

送韓孝廉應試

羅浮靈秀誕驪珠千里公車指帝都豈必光榮歆二鳥
已知山斗重三吳昔爲令客相如壁今作羈人阮籍途計

日彤廷雄大對卿雲五色麗天衢

韓鹽院檄存有感

衡門寥閭瑣蒿菜何意虛聲混栢臺王湛不知雖未死東
之已老敢論才山林遠志終難出泉石膏肓詎可回永夜
巡簷瞻北極客星安得傍三台

分得岱松清嶺送韋別駕擢守高郵

佐郡名高百尺松泠然天籟出秦封雲行淮海聲千里風
動江山路幾重春入燕堂開芍藥月明甍社起蛟龍大才
莫厭勞州縣安石由来自亢宗

雪中趙仁甫書至以太夫人塋錄暨芝圖集見寄

疎合同雲歲序催故人書札報江梅登壇已擅連城價開
卷真看白雪才用拙孤臣成左次居廬孝子服南陔春風
計日趨朝便莫惜停橈顧草萊

長至日黃大中丞書至見贈二詩奉荅

開府才猷自寶臣澄清齊魯見經綸須知江夏無雙價又
屬溫陵第一人誰采芻蕘涸清聽忽邀風雅惠貧身焚香
三復神俱往不柰雲山阻問津

牛女分輝福七閩武夷聳秀實生申昔爲對日岐疑者今
作擎天砥柱身韻入牙絃慚子夜詩傳郢曲是陽春寧知
空谷希聲日滿耳鈞天獨爽神

和韻荅施同卿

羨君天闕快飛鳴廿載題屏樹姓名總是雲泥成異路喜
從唱和托同聲春風漸煖花前賞江月猶寒石上盟聞道
熙朝須碩輔登庸且莫厭承明

歸太學渾噩惠新茶

經時荒館渴相如一裹持將慰索居旋侈旗鎗煮瓦鼎未
輸龍鳳賜華裾有懷韋曜當君酒無俟劉琨寄弟書鯨吸
定教終七碗豈同漱石固牙車

集夢鹿堂和文起韻

水亭芳讌物華新入夏園林尚有春大夢已醒蕉覆鹿小

山偏喜月留人青雲顧盼多先輩白首追陪媿後塵欲飲
獨餘孤興在飛觴到爾莫辭頻

虞山書院落成爲耿明府賦

琴川豈獨聽鳴琴更有絃歌似武城桃李芳菲時雨潤鳶
魚飛躍海天平見聞一脉儀刑在彷彿千秋廟貌成此日
得人無俟問懸知不讓魯諸生

蔣太夫人貞節

三徑春歸何有天孤幃人畢未下緣燈前課讀光榮啟堂
上承歡孝義全凜凜霜風能弭暴溫溫冬日足延年豈惟
巽命褒高行還擬彤編述母賢

贈雲衢李二尹并賀得孫之喜

早膺賓薦踐天衢佐治松陵代剖符出政仁聲推二令過
關紫氣及三吳眼前大隱猶龍臥膝下承歡亦鳳雛聞道
蘭房徵燕夢已知宅相光懸弧

贈王氏二節婦

寶婺光中耀德門北堂闔範樹金萱貞姑令婦兩無玷孝
子慈孫均沐恩再世嬪風永葉在千秋家法荻書存莫嫌
綸緯來何暮桃李成蹊自不言

葉給諫處元携具正歌館

雨餘荒館條囂塵恰喜清風來故人節序方驚生半夏亞

觴尚可借殘春逢迎暫擬開三徑離索何嫌絕四隣相對
共憐青眼在論交肯許白頭新

王侍御李明府相繼物故感而有作

驄馬行空不復歸仙是忽去欲何依名懸柱後青雲杳
斷關門紫氣微明月去山雙屐冷列星沉海二毛稀人間
多少彭殤感只合交知減帶圍

余聿雲枉過見贈次荅

雄才賦就魯靈光中的應知擅壁張正是熙朝須石畫
時通籍綰銀章招尋不惜紆雙鳥倉卒無能舉一觴見說
仙舟戒明發好畱春雪滿金闕

節婦

共姜節烈自千春
高行聲華迥絕塵
寒月已成傷
外覓孤雲應作未
亡人容光憔悴青鸞杳
膏沐銷沉白髮新
不轉貞心雖匪石
入江還化望夫身

漫作

破榻酣眠耻獨醒
篆浮茶熟有餘馨
傭書偏喜桑皮紙
誦法何須貝葉經
世上榮名俱浪跡
眼前花鳥自忘形
一絲隨處堪垂釣
豈必桐江着客星

食貧

充庖豈必歎無魚
炊黍烹葵亦晏如
衍衍簪鴻餐素外
啣

嘯野鹿食華餘猶欣短褐能供布非爲長齋不厭蔬伏櫪
空存投筆氣柰言生計在傭書

送毛肇明補任泰順

試問河陽滿縣花何如毛喜蒞東嘉地溫日日春生谷俗
古村村夜浣紗潮入海門通極浦泉分山麓映飛霞待將
譽命蜚丹闕定見恩綸報及瓜

和令君再顧賦謝

千秋聲價重祁侯仙令爲邦與古齊無數桑麻春遍地不
言桃李下成蹊尋幽里巷慚雌伏仰德琴堂識鳳棲誰謂
神君能久借延登先已俟金閨

黃元卿枉過次荅

華門長日艸盈庭特爲通家一啟局聞道鳳雛千里至須
教蝶夢片時醒桂香世集存遺澤梅嶺諸篇發地靈此去
南都人拭目應知東壁是文星

題汪贈公像

贈公仙去竟微茫想像頻驚何有鄉客豈傳神如立本天
因孝感慰王陽典刑具在貽謀遠廟貌常垂世澤長試看
淳恩輝繼養千秋俎豆自洋洋

祁明府政成得鹿

分符理劇表扶風報政賢聲起試功正及仙鳬翔闕下喜

看馴鹿產庭中歌傳莘野賓咸集春滿棠陰兆得雄豈必
鄭弘徵夾鼓須知明府亦三公

壽侯官陳博士二首時象賢轉令嘉定博士以迎養
至及辰稱觴

太丘苗裔之閩豪奕葉賢聲總鳳毛製錦自堪裁舞綵鳴
琴不必奏雲璈杏壇敷教青毡暖花縣稱觴紫氣高共說
熙朝求舊德佇看巽命列仙曹

從知閩嶠近仙都仙骨無煩大藥扶畊野昔傳山韞玉潤
川今見蚌生珠一官寄跡猶龍臥千里承顏羨鳳雛聞道
辟雍將拜老只須綸綽起雙鳬

還青亭四首爲方侍御黃中賦

名園亭榭一時新
憶昔無懷別有民
述作不須邀謝眺
畫圖無俟借公麟
西山爽氣人間世
華表仙踪物外身
此日文孫恢舊業
青青松竹自長春

遠來松竹足凭闌
縹緲虛亭得大觀
繩武山中靈壽杖
貽謀柱後惠文冠
一丘一壑留眞賞
半郭半村宜歲寒
還擬明堂爲匠石
佇看發軔在臺端

菟裘百畝卽丹丘
鶴夢重回感昔遊
亭自艸玄瞻祖德
風存辭白作孫謀
典刑彷彿葵墻見
松竹陰森俎豆留
乘史須編耆舊傳
豈惟卓茂得封侯

聞道樅陽舊隱居
筆牀茶竈枕中書
千章樹色青排闥
四壁苔痕綠引裾
高士自懸徐穉榻
賢孫曾御太丘車
只今端笏勤宣日
莫歎承明別有廬

和荅吳仲玉過訪

新都仙客絕風塵
倚棹來尋物外身
扣戶只疑題鳳字
投璫却喜出龍賓
氣含蘭蕙風仍古
賦就靈光意獨新
老我經年沾筆研
媿無佳思和陽春

湧興

予身離索亦雲林
柳市臯橋總陸沉
無意馳驅甘伏櫪
游神山水不須琴
聲名轉媿虛何益
踪跡翻嫌隱未深
報道

朝來風入樹可能不起棄瓢心

壽劉廉憲

壽域初開喜及辰青鸞白鹿報長春
車懸丹轂方升日帶緩黃金未老身
天許尋山借安石人疑採藥過劉晨
觀魚賸有濠梁興坐見鰲頭起釣綸

次韻荅陳省元居一

三江秋入氣蕭疎千里寧親候起居
此日方回昌邑棹浹旬却寄豫章書
嘉名到處先驚座逸興尋源尚閭漁
不父池頭應起鳳引雛還御太丘車

椿臺玉樹題蔣轉運手植玉蘭

琪樹年年手擇新一株難老亦靈椿影搖疑借藍田色香
散平分楚畹身淑氣護持和氏璧土膏培植席中珍廣陵
漫侈瑤花觀何似當庭別有春

蘭徑梅花爲蔣國博賦

錦里先生不厭貧種花還狎灌園人廣平作賦才情在何
遜題詩翰墨新閱世貞姿歷冰雪歲寒心事寄松筠春來
看結青青子猶可調羹獻紫宸

次韻荅王孟禮

多君獨步擅江東四壁慚予類若空
鴉自應談世務飛鳥何意覓衰翁
未能倒屣迎方外却喜奇書入帳中
想得

溪邊朗吟處近山烟雨一推蓬

感夢

倦遊回首玉京塵信宿升沉入暮春短褐十年三報罷長
河千里一歸人身安吳市青毡在忝然邯鄲白髮新何事
債緣猶未竟至今殘夢尚迷津

懷舊郡侯石公

湛者自湛浮者浮豫章安得致書郵十年契濶疎通問千
里音容歎阻修澤滿棠陰餘撫字風傳桂籍驗箕裘吳雲
楚水成遙憶極目江天一倚樓

潘氏留餘堂

老去尚書道義尊美哉輪奐百年存膚公奕奕還天地陰
德冥冥蔭子孫楊寶自來綿世澤于公何必侈高門須知
卞雪餘深秀不盡溪山裕後昆

七夕立秋

立春元日百年逢又見秋期七夕同天上雙星渡河漢人
間一葉落梧桐西流流火已如箭東望望舒方似弓時序
偶隨佳節換炎涼巧拙任天工

贈張孟孺

雲帆一葉忽東來聞道樓船海上回豈是將軍慵破浪自
緣開府倍憐才能文合草修期檄推轂宜登郭隗臺興到

庾公元不淺還應乘月侍銜杯

申柱國贈繆仲晦詩命嗣響爲賦

堂開綠野卽瑤臺藻賦聯翩手自裁祇謂陽春應寡和却
憐同調更多才月中寶斧還脩桂席上珍盤且糝梅信是
王符宜倒屣不須魏勃掃門來

送徐禮部赴召

釋褐分符已歷年旣塵魚釜尚蕭然官階已進猶三揖生
計不營無一屢台座掄才應下榻宗城著論合推賢久虛
清要儲積榦好趨長風著祖鞭

送陳居一會試用韻

羨君弱冠冠賢書矢志應知在掃除再獻總經箋別後三
冬已足五車餘和鳴舊卜于飛鳳縱壑今看欲化魚聞道
九重方好少彤廷指日聽傳臚

送從孫如城會試

亢宗又見發難年所喜孫枝有象賢身入辟雍推國士經
明家學續韋編謝庭玉樹方驚眼王氏青箱應比肩自是
關予門戶事臨岐三祝着先鞭

送陸季淳禮白岳

齊雲雲外列雲屏負笈憐君禮帝庭試向青山簪画筆須
從白岳得真形漫將盤礴爲行計定有江湖問客星況是

探微聲價在不妨隨地一揚舠

陳潛院惠存

關河憶昔對丰神回首雲泥三十春
驄馬再膺新命重文鋸猶贖故人貧
箕裘紹述光前烈簪笏勤宣柱後身
聞道廟堂須碩輔佇看臺閣贊經綸

自慰

叢桂香清玉露寒秋風搔首一凭闌
鶯花殘夢莫須有泡影虛名如是觀
世外小山無老少人間大覺卽邯鄲
浮生只當蘆洲宿滿眼波濤強自寬

閱賢書見昆張諫議是陵徐諫議琴川孫太學俱有

孫同薦志喜

夕郎星散朝端望高士雲歸席上賓此日喜聞緇武客一
時同作折花人東溟蚌老珠胎出南國庭空玉樹新白首
通家感疇昔宵分夢晤共怡神

赴文起弄璋之燕

閨閣徵蘭喜弄雛華堂芳燕慶懸弧此時襁褓占英物他
日箕裘驗壯圖水暖渥洼龍有種月明滄海蚌生珠扶藜
幸廁嘉賓後五世通家一老夫

贈周寄加

家庭日日樂天倫江左翩翩大雅人業寄簞揚餽作市門

當臨頓里名仁百年將半巖居興一諾千金義俠身莫訝
風前頻顧曲斑衣時着亦娛親

寄題父質父市隱幽居

朱雀桁頭好賣書解衣盤礴亦田畬到門紫氣鍾山色叩
戶鳴鑾長者車湫隘不須嫌近市蓬蒿元可卜幽居人生
何必長安米江上承明別有廬

日涉園爲蔣無掩賦

虞龍風烟勝境開名園一曲絕氛埃四時對酒群峯入三
徑邀賓二仲來檜列星辰森劍氣川觀山水傍琴臺從知
杖屨徜徉處未許當門鎖綠苔

寓感

何須紫陌聽鳴雞
滿耳紛紜事不齊
萬樹殘英多落溷
一春飛絮半沾泥
曳輪曲徑翻成捷
鼓柁通津或是迷
爲語漢庭西極焉
若從立仗莫騎嘶

毛肇明令泰順
旣以勤廉膺薦
忽移病致其仕
銓司惜才爲注
改教賦此勸駕

心勞巖邑口碑傳
栢府飛章薦獨先
一夕移文辭五斗
重看捧檄兆三鱣
暫淹驥足傳經日
定見龍樓脫穎年
野老亦知勤勸駕
豈容清世有遺賢

已酉春小園生芝
覺甫伯樞聞而過
觀至則已爲人

采去相顧悵然明日覺甫伯樞以詩見寄不意今年芝復生舊處賦此欲報二許稿欲脫而二許遣至遂寫贈云

當門憶昨摘芝房此日仍看三秀芳煥若神明還舊觀依然玉樹發重光商山似錫人難老玄澗應占言有祥服食不煩邀許邁祇須快讀隔年章

贈鄭從事

躬耕谷口合明揚通藉于今綬尚黃自許一官堪報國敢云千里不齋糧身勞幕下心如水夢入莆中姓有鄉閭道憲司方考最佇看簪笏列鵷行

陳國傳携具見過奉贈

經學掄魁驚座豪拜官應早列仙曹十年三仕宦猶拙一
轉四門名益高虎觀定收騏驥足鸞臺宜老鳳皇毛慚無
奇字堪相問誤辱携尊倒雪醪

韓令君下車以來政聲籍甚聊借口碑用當謳歌
初政雲間百里傳須知疲劇藉名賢即看剖竹皆迎刃益
信搯刀可割鮮夙望一韓山斗重新聲五美口碑懸陟明
計日登臺者可許吳民借所天

丘臨汀誕辰令子成進士乞假稱觴

東南華譽美璠璣劉沈文章定不如剖竹豈須勾漏令思

尊不為武昌魚門前喜報泥金日天上籌添海屋初獻壽
家家歡戲綵摠輸畫綉舞華裾

賦得若虛齋題曹文學新舟

飛廬一葉漾中流不羨仙人十二樓世上風波俱幻境尊
前烟月即瀛洲蘭橈入水蛟文亂桂楫乘潮蜃市收漫指
片雲生海上無妨李白恣遨遊

錫土世家為郭明府賦

千秋勲德重汾陽百葉仙源衍世芳澤借義姑如有子綸
分買德豈非卽須知大業應從郭誰謂馨兒必屬王兩姓
均封恩並渥祔陵錫壤沐餘光

原缺

七言排律

詠申少師 天恩存問

上相承恩綠野堂
天門朝下紫泥章
嘉謀入告乾符合
溫詔方來泰道昌
千里不須憂社稷
一人先已建元良
當時獻替勞心力
此日絲綸表贊襄
內使緘題中聖酒
太官揀發上林羊
貨緣貴德文鏹出
享欲多儀彩幣將
交合地天占有道
歡騰朝野頌無疆
山中未許盟猿鶴
膝下欣看起鳳凰
總是貧交長曳尾
泥塗亦得借餘光

少師申公七十敬賦十五韻爲壽

堂開綠野及嘉辰
朝野稱觴第一人
接轂羣公傾御李
懸

張此日慶生申期當五百膺名世桃熟三千謝秉鈞雪月
暫淹登眺展烟霞未老濟時身 帝傳丹詔存良弼天爲
蒼生祐寶臣梧竹片時棲鶯鶯勲名元自冠麒麟燮調黃
道謀猷入翊戴青宮啟沃親熙載三朝勞補衮傳經奕葉
紹垂紳勸宣邦政金門重次第科名玉樹新座上賡歌舜
琴曲尊中醺醪帝壺春台聯南極星爲主節近中秋月作
賓九轉不煩成大藥百年元自屬天民雲霄合有青鸞卜
山徑行看白鹿馴門下瓊龍方濟濟車前麟趾更詵詵須
知夢卜求元碩計日徵書下紫宸

送劉明府晉權之留京

理劇才優詆屢迂松陵政績更稱賢心勞實以民爲子腰
折虛疑今是仙教洽賢愚俱木鐸刑詳輕重總蒲鞭堤成
上下元無費廩發兵農兩不偏時爲芝蘭剪荆棘須知鸞
鳳寓鷹鷂銓衡自合推三善父老惟應具一錢飛蓋金陵
看化鳥登壇石畫簪籌邊寧知岐路攀車處賦就江淹獨
黯然